

կարողանում էր վճարել իմ ամսականը, իսկ ընծաների փոխարեն ես կատարում էի վարժապետիս տնային գործերը: Առաւօտից մինչեւ երեկոյ հանգստութիւն չունէի. աղբիւրից խմելու ջուր էի բերում, կովերի համար ուտելու խոտ էի քաղում դաշտից, հորթերը բռնում էի, մինչեւ երեցկինը կովերը կթում էր, եւ եթէ ուրիշ գործ չէր լինում, ճաշից յետոյ նստում էի վարժապետիս կողքին, ճանճեր էի քշում, որ նրա անուշ քոնը տանի...

Պատահում էր, մեր թաղում մկրտութիւն էր լինում կամ թաղում. այն օրը վարժապետիս համար հարսանիք էր, իսկ մեզ համար մահ: Աշակերտներից մի քանիսը, որոնք մեծ էին հասակով եւ տիրացութիւն անել գիտէին, վեր էին առնում տեր հօր փիլոնը, մաշտոցը, բուրվառը, եւ քահանայական այլ սպասները: Նրանք գնում էին խորհրդի տեղը: Այսպիսի դէպքերում, երբ կարող էինք մի փոքր ազատ շունչ քաշել, ասելի դառն էր լինում մեր վիճակը: Վարժապետը մտածելով, որ իր բացակայութեան ժամանակ մենք անկարգութիւններ կանենք, հնարել էր մի սատանայական միջոց մեզ հանգիստ պահելու համար: Նա մեզ նստացնում էր միմեանցից հեռու, մեր հագուստի լայն փեշերը տարածում էր գետնի վրայ, նրանց վրայ ածում էր մանր աւազ, յետոյ աւազը դրոշմում էր փայտեայ կնիքով, որ յատկապէս դրա համար պատրաստուած էր: Երեւակայեցէ՛ք մեր դրութիւնը, ամբողջ ժամերով պետք է մեխած մնաս գետնի վրայ, մի շարժում անգամ անել կարող չես, որովհետեւ իսկոյն աւազը կը խառնոի, կնիքը կը լուծոի, եւ վարժապետը այդ տեսելով, հոգիդ կառնէ...

Այսպիսի պատիժներին խիստ յաճախ ենթարկւում էի ես: Բարերար աստուած, ի՞նչ պետք է անել, խօ մեռել չէի՞, որ անշարժ մնայի: Պատահում էր, կամ լուռ էր կծում, կամ ճանճն էր նեղացնում, կամ վերջապէս մի ուրիշ հարկաւորութիւն ունէի... Վարժապետը դառնում էր տուն մի փոքր տաքացած գիտով. նա գտնում էր կնիքը լուծուած, այն ժամանակ պատրաստ էր ինձ համար կամ անիծուած ֆալախկան, կամ մերկ ծնկներով չոքել աղիւսի մանրած կտորների եւ կամ սիմինդրի հատիկների վրայ: Դարձեալ պետք է անշարժ մնայի...

Լինում էին օրեր, որ պատիժը ընդհանուր էր դառնում. աշակերտները բոլորը միասին պատժւում էին: Տարոյ մէջ մի քանի անգամ մենք ունենում էինք արձակուրդներ: Մեծ արձակուրդները լինում էին զատկի եւ ծննդեան տօների ժամանակ, իւրաքանչիւր տօսին մի-մի շաբաթ: Երբ տօներից յետոյ աշակերտները կրկին հաւաքւում էին դպրոցը, մեր վարժապետը առանց խտրութեան աշակերտների ոտները դնում էր ֆալախկայի մէջ եւ բոլորին հաւասարապէս ծեծում էր: Ինչո՞ւ համար: — Այդ նրա համար էր, գուցէ աշա-